

दिनांक 29.07.2025

समय: 18.45 बजे

आकाशवाणी जयपुर—अजमेर
प्रादेशिक समाचार

- प्रधानमंत्री नरेन्द्र मोदी लोकसभा मांय ऑपरेशन सिंदूर रा बारा मांय व्ही चर्चा रो जवाब देता थकां इण ने विजयोत्सव बतायों
- गृहमंत्री अमित शाह लोकसभा मांय कह्यो— पहलगाम हमला रा आतंकी फौज रा साझा अभियान मांय ढेर व्ह्यां
- मुख्यमंत्री भजनलाल शर्मा प्रधानमंत्री नरेन्द्र मोदी सागे मुलाकात कर र राज्य रा विकास ऊं जुड़्या मुद्दां माथे चर्चा कीनीं
- राज्यपाल हरिभाऊ बागडे कह्यो—भणार्ई—लिखार्ई रो मकसद समाज मांय सकारात्मक बदलाव अर जनता रो भलो व्हेवणो चाहिजें
- प्रदेश मांय तेज बारिश ने ध्यान राखता थकां लोगां ऊं नदियां रा बहाव हलका ऊं दूर रेहवण री अपीलं

000

प्रधानमंत्री नरेन्द्र मोदी ऑपरेशन सिंदूर ने विजयोत्सव बताता थकां इण ने 140 करोड़ जनता री इच्छा शक्ति री निशाणी बतायो हैं वे आज लोकसभा मांय ऑपरेशन सिंदूर रा बारा मांय व्ही चर्चा रो जवाब दे रह्या हैं प्रधानमंत्री देश री जनता रो आभार जताता थकां कह्यो के संसद रो ओ सत्र विजयोत्सव अर भारत रा गौरवगान रो सत्र हैं

.....

गृहमंत्री अमित शाह सदन ने ऑपरेशन सिंदूर अर ऑपरेशन महादेव रा बारा मांय जाणकारी देता थकां कह्यो के फौज पहलगाम हमला मांय शामिल तीन आतंकवादियां ने मार दीना हैं वे बतायो के आं आतंकियां कने ऊं तीन राइफल जब्त करीजी है, जो पहलगाम आतंकी हमला मांय काम लीरीजी हीं श्री शाह कह्यो के सुलेमान शाह, जिबरान अर हमजा अफगानी नाम रा आं आतंकियां ने मार दिया ज्या हैं वे कह्यो के खुफिया एजेंसियां कने जरूरी सबूत मौजूद हैं

.....

गृह मंत्री कह्यो के जाँच टीम हमला रा पीड़ित पिरवारां, सैलानियां, टट्टू चलावण वाळां, फोटो खींचण वाळां अर वठे रा रेहवासियां ऊं मिली जानकारी रा आधार ऊं कार्यवाही कीनीं राज्यसभा मांय ई आज ऑपरेशन सिंदूर ऊं जुड़ी खास चर्चा व्हीं रक्षा मंत्री राजनाथ सिंह चर्चा री सुरुआत करता थकां जम्मू—कश्मीर मांय तीन आतंकवादियां ने मार देवण सारू फौज अर हिफाजती दस्तां ने बधाई दीनीं श्री सिंह कह्यो के ऑपरेशन सिंदूर रे ज़रिए भारत दुनिया ने बता दीनो के वो

आतंकवाद रे खिलाफ लड़ाई मांय किंण ई हद ताई जावण सारु तैयार हैं वे विपख ऊं हिफाजती दस्तां री बहादुरी अर मनोबल ऊं जुड़्या मामलां माथे सियासत ऊं बचबा सारु कह्यो रक्षा मंत्री कह्यो के ई ऑपरेशन रो मकसद आतंकी ठिकाणा ने खत्म कर र आतंकवाद ने बिल्कुल बर्दाश्त नी करण री नीति ने मज़बूत बणावणो हों

.....

000

मुख्यमंत्री भजनलाल शर्मा आज नई दिल्ली मांय प्रधानमंत्री नरेंद्र मोदी सागे मुलाकात कर र प्रदेश रा विकास ऊं जुड़्या मुद्दा माथे बातचीत कीनीं मुलाकात पाछे मुख्यमंत्री कह्यो के प्रधानमंत्री सागे राज्य मांय चाल रही विकास री परियोजनावां, निवेश री संभावनावां अर जनता रा भला री योजनावां रा बारा मांय चर्चा करीजीं वे बतायो के प्रधानमंत्री राज्य ने और मदद देवण रो भरोसो दिरायों

000

राष्ट्रीय शिक्षा नीति-2020 लागू व्ह्या आज पांच साल पूरा व्हे गया हैं नुवी शिक्षा नीति आवता बगत री जरूरतां रे मुजब शिक्षा प्रणाली ने और समावेशी अर विद्यार्थी-केंद्रित बणावण री कोशिश हैं आज नई दिल्ली मांय अखिल भारतीय शिक्षा समागम 2025 मांय केन्द्रीय शिक्षा मंत्री धर्मेन्द्र प्रधान कह्यो के आवता बगत मांय ई नीति ऊं देश री शिक्षा प्रणाली मांय मोटो बदलाव आवेलं

.....

केन्द्रीय शिक्षा मंत्री पाली मांय पीएम श्री केन्द्रीय विद्यालय रा नुवा भवन रो आज वर्चुअल तरीका ऊं उद्घाटन कीनों देवस्थान मंत्री जोराराम कुमावत कार्यक्रम री ठोड़ माथे शिला पट्टिका रो अनावरण कीनों नुवी शिक्षा नीति रा बारा मांय आकाशवाणी रा जयपुर केन्द्र ऊं आज रात 08:15 बज्या खास कार्यक्रम प्रसारित कर्यो जावेलं

000

चूरू जिला रा नुंवा गांव री सरकारी सीनियर सैकण्ड्री स्कूल रा कम्प्यूटर शिक्षक दिनेश आज प्रधानमंत्री नरेन्द्र मोदी सागे नई दिल्ली मांय मुलाकात कर र नुवी शिक्षा नीति रा बारा मांय चर्चा कीनीं श्री दिनेश कम्प्यूटर रा हलका मांय केई नुवा काम कीना हैं शिक्षा मंत्रालय री ओर ऊं वां ने प्रधानमंत्री सागे मुलाकात सारु न्यौतो दियो ज्यो हों

000

राज्यपाल हरिभाऊ बागडे कह्यो है के भणार्ई-लिखाई रो मकसद समाज मांय सकारात्मक बदलाव लावणो व्हेवणो चाहिजें श्री बागडे आज भरतपुर मांय महाराजा सूरजमल बृज विश्वविद्यालय रा पांचवां दीक्षांत समारोह मांय बोल रह्या हां वे कह्यो के केवल डिग्री हासिल करणो पर्याप्त नी है बल्कि हासिल करी ज्या ज्ञान ने समाज रा भला सारु काम मांय लेवणो जरूरी हैं

.....

जळसा मांय राज्यपाल विद्यार्थियां ने उपाधियां दीनी अर अव्वल विद्यार्थियां ने तमगा दे र नवाजां ई मौके उपमुख्यमंत्री डॉ. प्रेमचंद बैरवा नौजवानां ऊं हमेशा सीखता रेहवण बाबत् कह्यो

000

राज्य रा लंकाऊ अर ऊगणी हलका मांय काल भारी अर कठे-कठे घणी भारी बरसात रा आसार हैं मौसम विभाग 31 जुलाई ने उदयपुर, भरतपुर, जयपुर, अजमेर, बीकानेर अर कोटा संभाग मांय कठे-कठे जबरदस्त बिरखा बाबत् चेतायो हैं इण ने ध्यान राखता थकां प्रशासन जनता ऊं नदियां रा बहाव हलका रे आरे-सारे नी जावण अर सावचेती राखण री अपील कीनी हैं ई बीचे आज ई केई ठोड़ां हल्की ऊं तेज बिरखा रा समाचार मिल्या हैं भरतपुर मांय लारली रात ऊं ही रुक-रुक र बरसात व्हे रही हैं म्हाणा खबरनवीस बतायो के लारला दिनां व्ही भारी बारिश रे कारण केई गांव खास गेला ऊं कट गया हैं

.....

मौसम विभाग रे मुजब लारला चौबीस घंटा मांय प्रदेश रा ऊगणी हलका मांय केई ठोड़ां ज़ोरदार मेह बरस्यो सब ऊं बत्ती 13 सेंटीमीटर बारिश राजधानी जयपुर मांय व्ही, जदके बारां ज़िला रा अटरू मांय 11 सेंटीमीटर बरसात व्हीं लालसोट, बकानी, बिजौलियां अर बहरोड़ मांय ई 5 ऊं 9 सेंटीमीटर बीचे बिरखा व्हीं अलवर, टोंक, भरतपुर, चित्तौड़गढ़, अजमेर, सिरोही, झालावाड़, करौली अर सवाईमाधोपुर मांय हल्की ऊं मझला दर्जा री जदके राज्य रा आतूणी हलकां मांय कठे-कठे हल्की बिरखा व्हीं लगातार व्हे रही बारिश ऊं कूड़ा-बावड़ियां, तळावां, नदियां अर बंधां मांय पाणी री चोखी री आवक व्हे रही हैं चम्बल नदी मांय पाणी लेवल खतरा रा निशाण ऊं ऊंचो निकळ ग्यो हैं

000

आज अंतर्राष्ट्रीय बाघ दिवस हैं दुनियाभर मांय बाघां रा कुदरती रेहवास री हिफाजत अर वां ने बचावण रा बारा मांय जाग जगावण रा मकसद ऊं ओ दिन मनायो जावे हैं ई मौके केंद्रीय पर्यावरण, वन अर जलवायु परिवर्तन मंत्री भूपेंद्र यादव कह्यो के अब देश मांय 58 बाघ अभ्यारण्य व्हे ग्या हैं केन्द्रीय मंत्री बाघां ने बचावण मांय भारत री ध्यानजोग कामयाबी रो सोशल मीडिया पर जिक्र करता थकां कह्यो के 58 अभ्यारण्यां अर तीन हजार छह सौ 82 बाघां सागे भारत वां ने बचावण रा मामला मांय मिसाल बण र सामी आयो हैं बाघां ने बचावण मांय राजस्थान रो ई खास काम हैं बाघां रा कुदरती रेहवास वाळा बूंदी रा रामगढ़ विषधारी, धौलपुर-करौली टाइगर रिजर्व खास हैं वठे सदाबहार जंगल व्हेवण ऊं बाघां ने आज़ादी ऊं घूमण री ठोड़ मिलेलां सरिस्का टाइगर रिजर्व मांय अब बाघां रो कुनबो बध र 48 ताई पूग ग्यो हैं ई सागे ई सवाईमाधोपुर रो रणथम्भौर बाघ अभ्यारण्य ई आखी दुनिया मांय बाघ देखण सारू मशहूर हैं वनमंत्री संजय शर्मा आज रणथम्भौर रा जोगी महल गेट परां नामी बाघिन **मछली** रा स्मारक रो अनावरण कीनों

000